

Da Gion Paul II a Francestg

Ina gasetta franzosa commentescha

DA GUIU SOBIELA-CAANITZ

■ **Dumengia proxima, ils 27 d'avrigl duai il papa latinamerican proclamar sontgs dus da ses antecessurs europeics, in dal vest ed in da l'ost, che han bullà noss continent en la segunda mesadad dal tschientaner passà: Gion XXIII (Angelo Giuseppe Roncalli, 1881–1963) e Gion Paul II (Karol Józef Wojtyła, 1920–2005).** Domadus avevan num Giusep, ma uschiglio eran els vaira differentes. «Le Monde» (Paris) dals 20 d'avrigl ha deditgà sia entira p. 15 a cumparegliar Wojtyła cun ses successur Benedetg XVI (Josef Ratzinger) e cun Francestg (Jorge Mario Bergoglio), lur successur d'oz. Igl è curius che quella data dals 20 d'avrigl è gist l'anniversari d'in «antipapa» da nausch num che ha bullà l'emprima mesadad dal tschientaner passà: Adolf Hitler, naschè ils 20 d'avrigl 1889. Anc pli remartgababel èsi che lezs trais papas vegnan confrontads da la gasetta probablmain la pli famosa d'in dals pajais ils pli secularisads da l'Europa. Ma «Le Monde» resguarda adina puspè l'avaina catolica averta che ha fatg part da sia fundaziun il 1944. Uschia renconuscha l'impurtanza dal fatg religius era per la Frantscha. La pagina è intitulada: «Jean Paul II e François, deux souverains pontifes et une même priorité».

La secularisaziun sco sfida

Henri Tincq, autur da l'emprima contribuziun, ha già scrit plis cudeschs e nondumbraivels artitgels a dumondas religiusas. El scriva: «La canonisaziun (...) da papa Gion Paul II (...) fa bun l'ingiustia d'ina memorgia curta che chala. La popularitad globala da papa Francestg fa donn al papa polac (...). Ins emblida l'emprim papa vegnì da l'ost che ha



Gion XXIII (Angelo Giuseppe Roncalli, 1881–1963) e Gion Paul II (Karol Józef Wojtyła, 1920–2005) vegnan declarads sontgs.

‘victorisà sur il communissem’ (...) e sustegnì ils dissidents da là. Karol Wojtyła ha gidà eroicamain a metter ad ir in'era da libertad e democrazia en Europa. Ma il temp smanatscha ses maletg e sia bilantscha. El semiava daditg in'Europa recristianisada che n'è mai vegnida (...). Il sanguinus naziunalissem è sa dasdà, in chapitalissem ed ina toleranza sfranads han triumfà (...). Gion Paul II n'ha betg pudì conciliar quai ch'el numnava ils ‘dus pulmuns’ dal cristianissem, l'oriental e l'occidental (...). El n'ha betg chapì la grevezza da la pedofilia clericala (...). Las inquisiziuns giudizialas e la tenuta pli ferma da papa Ratzinger han punctuà silsenter la tschorvavad da Gion Paul II [en lez regard] (...). L'acziun curaschusa da papa Francestg cuntrastescha dapi in onn cun la direzza moral da Wojtyła (...). Quest pativa da l'obsessiun da duas secularisaziuns, la dascusa en l'Europa dal vest e la brutala en l'Europa commu-

nista (...). Papa Francestg perencunter ha declarà a la revista gesuitica ‘Civiltà Cattolica’ dals 17 da settember 2013: ‘Il lamentim cunter in mund barbaric na gida mai a chattar Dieu’ (...). Domadus papas han dentant fatg endament cunsnuzi la dictatura e l'oppressiun – la communistica en Pologna, la militar e finanziaria en Argentina (...). Per domadus vala l'urgenta prioritad per ‘ils pli paupers’ (Francestg) ed ils ‘blessads da la vita’ (Gion Paul II). Domadus mettan en dumonda in mund nua che l'idolatria dals daners ed in liberalissem ‘selvadi’ triumfeschan. Francestg surpiglia l'ierta da Gion Paul II areguard dumondas essenzialas, sco nunviolenza e pasch, dretgs umans, respect absolut da la vita, dialog tranter culturas e religius (...). Domadus èn fidaivels a las ‘beadientschas’ da l'evangeli, empermessas als paupers, als contrastads ed a tgi che ha fom da giustia.»



FOTOS KEYSTONE

Triumfescha l'opposiziun conservativa?

La pagina «papala» da «Le Monde» cuntogna anc dus artitgels pli modests che commenteschan cunzunt las divergenzas tranter ils dus papas d'oz, l'actual e l'emertà. Il sociolog e scriptur Frédéric Lenoir ha intitulà ses essai: «Remettre l'Eglise sur le chemin de l'Évangile.» L'autur punctuescha pia las novaziuns, giond enavos per cuntrarstar enfin a la reformaziun: «Tut quai ch'il protestantissem ed il mund modern sbittavan è vegnì a simbolisar l'identitad catolica (...); lezza è pia sa sviluppada en reacziun encunter l'umanissem da la renaschientscha e da l'illuminessem. Pir cun il segund concil vatican ha la baselgia catolica renconuschì finalmain ils dretgs umans, la democrazia ed il spiert secular.» Il terz e davos artitgel, dal sociolog catolic da religius Olivier Bobineau («Institut

catholique», Paris) è cleramain pessimistic. L'autur punctuescha «ina realitad istorica fundamentala, numnadamain (...) la forza instituziunala che cumbatta mintga moviment da reforma.» El numna sco exempels papa Gregor VII (Hildebrand, † 1085), la cuntrareformaziun, Pius IX (Giovanni Maria Mastai-Ferretti, 1792–1878), Gion Paul II e Benedetg XVI. La conclusiun da Bobineau pon ins translatar sco suonda: «Quant ditg po il papa gesuit resister a lezza forza cuntraria che structurescha l'instituziun ch'el maina?» Tgi sa sche lezza conclusiun na munta betg ina moda e maniera diplomatica da dir che tut quellas fadias sajan finalmain adumbatten? Quai gies en il senn da Mephisto che di a Faust: «Ich bin der Geist, der stets verneint.» I vala tuttina la paina da leger quella pagina da «Le Monde» e lura far agens patrats en chausa.